



Kommune Qeqertalimmi najukkani ataatsimiititalianut ileqqoreqqusat

Kommunit aqunneqarnerat pillugu Inatsisartut inatsisaat nr. 29, 17. november 2017-meersumi § 32, naapertorlugu, aamma Borgmesterinik borgmesterillu tulliinik kiisalu kommunalbestyrelsinit nunaqarfinnilu aqutsisunut ilaasortanik aamma najukkani ataatsimiititaliat ilaasortaannut il.il. akissarsiaqartitsineq pillugu Namminersorlutik Oqartussat nalunaarutaat nr. 25, 30. december 2013-meersumi § 15 naapertorlugu, makku aalajangersarneqarput:

Kapitali 1

Siunertaq

§ 1. Najukkani ataatsimiititaliat sulianik, najukkami najugaqartut, peqatigiiffiit, kommunimi politikerit oqartussaasullu suleqatigiinnerisigut najukkani innuttaasut taakkulu atugassatigut, kulturikkut oqartussaaqatigiinnermilu periarfissaasa naleqartitaasalu ataannarnissaat ineriartorteqqinnissaallu anguniarlugu ingerlanneqartunik siuarsaanermikkut najukkani oqartussaaqatigiinnermik nukittorsaassapput.

Suliassat

§ 2. Kommunalbestyrelsip, Ataatsimiititaliaq INUA-ata ataatsimiititali atavartut piumasaqarnerisigut Najukkani ataatsimiititaliaq oqaaseqaasiortussaataavaoq. Najukkanili ataatsimiititaliat akissuteqarnermikkut nalunaarutigisinnaavaat, pineqartumut oqaaseqaatissaqaratik.

Najukkami ataatsimiititaliaq sumiiffimmi innuttaasunut immikkut ittumik sunniuteqarsinnaasunut tusarniaasoqarnerani akissuteqartassaaq, assersuutigalugu makku eqqarsaatigalugit: timalimmik pilersaarutinut, avatangiisinut, peqqissutsimut, angallanermut, timersornermut, atuarfeqarnermut, meeqqanut, inuusuttunut, utoqqarnut, kulturikkut sunngiffimmilu sammisassaqaartitsinemut tunngasut. Sullinneqarfiup iluaneersunit aamma avataaneersunit tusarniaassutit immikkoortinneqassapput. Kommunimit tusarniaasoqartillugu (sullinneqarfiup iluani) tusarniaanissamut pisussaaffeqartoqarpoq, sullinneqarfiullu avataani tusarniaasoqartillugu paasissutissiinissamut pisussaaffeqartoqarluni. Paasissutissiinissamut pisussaaffeqarneq isumaqartinneqarpoq, kommunimit tusarniaassummut akissuteqaat najukkami ataatsimiititaliamut ilisimatitsissutigineqassasoq/assilinera ingerlateqqinneqassasoq.

Imm. 2. Ataatsimiititanut atavartunut, kiisalu Ataatsimiititaliaq INUA-mut oqaluuserisassanut ilanngunneqartussanik najukkamut attuumassuteqartut eqqarsaatigalugit Najukkami Ataatsimiititaliaq siunnersuuteqarsinnaavoq.

Imm. 3. Ukiumoortumik aningaasaliissutit atortarnissaannut najukkami ataatsimiititaliaq Kommunalbestyrelsimit akisussaaffilerneqarpoq.

Imm. 4. Najukkami Ataatsimiititaliamut aningaasaliissutinit sumiiffimmi najugaqartut, peqatigiiffiit, kommunimi politikerit aammalu oqartussat akornanni suleqatigiinnerat, kiisalu sumiiffinni innuttaasut taakkulu timalimmik, kulturikkut oqartussaaqataanerisalu periarfissaasa naleqartitaasalu attannissaat inerisaqqinnissaallu siuarsarneqassapput.

Aningaasaliissutit akisussaaffigineri kommunimit piginnaatitsissummut kiisalu inatsisit allat atuuttut naapertorlugit isumagineqassapput. Kommunip piginnaatitsissutaa tassaavoq,

sumiiffimmi innuttaasut nalinginnaasumik pisariaqartitaannik naammassinninnissaq anguniarlugu, aningaasat kommunimit qanoq atorneqarnissaannut kommunimut tunngavissarinqartut.

Imm. 5. Aningaasaliissutit najukkami ataatsimiititaliamit akisussaaffigineqarneri pillugit immikkut nassuiaat.

Aningaasaliissutit nammineq atugassat isummerfiginissaannut suliani najukkani ataatsimiititaliat aalajangiisinnataapput. Apriilip qaammataa naatinnagu ukiup tullianut missingersuutissatut siunnersuut najukkami ataatsimiititaliamit nassiunneqassaaq. Aalajangernerup siunertaa pitsaassusaalu Allattoqarfik INUA-niit qulakkeerneqassaaq, Ataatsimiititaliaq INUA-nit akuersissutigineqassalluni.

Aningaasaliissutit atorneqarnerini makku pingaartinneqassapput:

- Aaqqissuussat, najukkami najugaqartunut ataatsimoornerulersitsisut inooriaatsimillu ilorraap tungaanut saatitsisinnaasut
- Aaqqissuussat, illoqarfigisami innuttaasut akornanni, atuisut akornanni, suliffeqarfiit akornanni, ataatsimoortukkaani assersuutigalugu utoqqaat, meeqqat, angajoqqaat imaluunniit ataatsimoorfiusartut arlaatigut anguniagaqarlutik pitsaanerulersitsinissaq anguniarlugu sulissuteqartartut
- Aaqqissuussat neqeroorutillu kulturikkut, nipilersornikkut, timersornikkut eqqumiit-suliornikkut sunngiffimmi sammisasaqartitsinikkut siunertarinqartut pitsaanerulersin-nissaannut ineriartortinneqarnissaannullu tunngassuteqartut
- Agguaanneqartussatut aningaasaliissutit aamma tusarniaassutinut tamanut ammasumik ingerlatitassanut, workshops-inut, suliniutinut, aaqqissukkanut allanut sulianulluunniit najukkami ataatsimiititaliap pilersitaanut atorneqarsinnaapput.

Imm. 6. Imigassanik sassaallertoqarluni aaqqissuussinerit aningaasaliiffigineqarsinnaangillat

Imm. 7. Aningaasat atorneqanngitsut ukiup tullianut aningaasaliissutinut nuunneqarsinnaangillat

Imm. 8. Sumiiffiit inerisarnissaannut sammisaqartitsinerni, suleqatigiissitsinerni, innuttaasunik ataatsimiisitsinerni allatigullu eqqartuinerni najukkami ataatsimiititaliamit innuttaasunik annertuumik peqataatitsisoqartassaaq.

Imm. 9. Kommune Qeqertalimmi najukkani ataatsimiititalianut illoqarfimmi pisortap allatseqarnissaq akisussaaffingaa.

Najukkami ataatsimiititaliap sumiiffimmi suliassaqarfii

§.3. Kommune Qeqertaliup Illoqarfiini sisamani tamani najukkani ataatsimiititaliaqarpoq. Najukkani ataatsimiititaliat tamarmik immikkut illoqarfimmi killeqarfii tikillugit, akisussaaffigineqarput.

Kapitali 2

Qinersineq

§ 4. Innuttaasunik ataatsimiisitsinermi najukkami ataatsimiititaliamut qinersineq pissaaq, qinersisoqarnissaalu ullut 14-it sioqqullugit nalunaarutigineqassalluni. Qinigassanngortittut tamarmik naligiissillugit tulleriarneqassapput. Allassimasuliortoqarsinnaangilaq.

Imm. 2. Inersimasut 16-ileereersimasut illoqarfimmi najugaqavissut kikkulluunniit najukkami ataatsimiititaliamut qineqqusaarsinnaapput, taamaattorli qineqqusaartoq 18-it inorlugit ukioqarpat angajoqqaatut oqartussaassuseqartut akuersiteqqaarneqassapput.

Imm. 3. Qinersinermi innuttaasunik ataatsimiisitsilluni pisumi, kikkut tamarmik 16-ileereersimasut illoqarfimmi najugaqavissut qinersisinnataapput. Qineqqusaartut akornanni qinersinissamut

takkuttut innuttaasunit qinerneqassapput. Innuttaasut tamarmik immikkut qinigassanngortittut marluk qinernissaannut marloriarlutik qinersitineqassapput. Taasineq isertortumik ingerlanneqassaaq, allakkatigut taasisoqassalluni.

Imm. 4. Najukkami ataatsimiititaliamut qinigassanngortinniarluni nalunaarneq pissaaq, qinersineq ullunik tallimanik sioqqullugu sumiiffimmi kommunip allaffianut nalunaaruteqarnikkut.

Imm. 5. Qinigassanngortitsinermi pisinnaatitsineq inerteqqutaanngilaq.

Imm. 6. Qinigassanngortittut akornanni tallimat inorlugit sassartoqassappat, qinersineq pissanngilaq, taamaalilluni illoqarfimmi pineqartumi najukkami ataatsimiititaliamik pilersitsisoqassanngilaq. Qinigassanngortittut tallimaannaappata, ingerlaannaq akuersissutigisassanngorlugit Kommunalbestyrelsimut innersuunneqassapput.

Imm. 7. Qinigassanngortittut siulliit tallimat akornanni naligiimmik taaneqarnerini, tamarmik Kommunalbestyrelsimut innersuunneqassapput. Naligiimmik qinerneqartuni allani naligiittut qinerneqartut akornanni makitsineq pissaaq.

Imm. 8. Qinigassanngortittut taaneqarnerpaat, najukkami ataatsimiititaliamut ilaasortanngornissaannut Kommunalbestyrelsimut innersuunneqassapput. Najukkami Ataatsimiititaliamut qinerneqanngitsoortut sinniisussanngortussanngorlugit kommunalbestyrelsimut innersuunneqassapput.

Imm. 9. Innersuunneqartut Kommunalbestyrelsimut akuersissutigineqarneri tunngavigalugit, najukkami ataatsimiititaliaq inissitsitissaaq. Taamaaliortoqassaarlu innersuussat Kommunalbestyrelsimut akuersissutigineqareernerini kingusinnerpaamik ullut 21-t qaangiutsinnagit.

Imm. 10. Qinersineq ukiut pingasukkaarlugit pisassaaq.

Najukkami ataatsimiititaliap katitigaanera il. il.

§ 5. Ataatsimiititaliami ilaasortat tallimaapput. Innersuussinerup kingorna najukkani ataatsimiititaliani ataasiakkaani ilaasortaasussat Kommunalbestyrelsimut toqqarneqassapput.

Imm. 2. Sinniisunut allattorsimaffik Borgmesterip Allatseqarfianit suliarineqassaaq. Allattorsimaffinni allanneqassapput qinigassanngortitat qinigaanngitsut, kisianni pisinnaanngitsoqalerneratigut taartaasussatut najukkami ataatsimiititaliamut ilaasortanngorsinnaatitaasut. Sinniisussanik allattorsimaffik najukkani ataatsimiititalianut ataasiakkaanut suliarineqassaaq, taamaalillutik qinigassanngortittut qinigaanngitsulli taagorneqarnertik malillugu tulleriinnilersorneqassallutik.

Imm. 3. Qinigassanngortittut arlallit sinniisutut allattorsimaffimmiittut akornanni naligiimmik qinerneqarsimappata, tulleriiarneri makitsinikkut aalajangerneqassapput, najukkamilu illoqarfimmi aqutsisoq makitsisuusaaq.

Imm. 4. Najukkani ataatsimiititalianut ilaasortat Inatsisartunut imaluunniit Kommunalbestyrelsimut ilaasortaassanngillat.

Imm. 5. Najukkami ataatsimiititaliamut ilaasortat sumiiffimminnit allamut nuuttut, ataatsimiititaliamit tunuassapput. Aammattaaq najukkani ataatsimiititalianut ilaasortat Kommunalbestyrelsimut imaluunniit Inatsisartunut qinigaasut taamatut.

Imm. 6. Najukkani ataatsimiititalianut ilaasortat namminneq kissaatertik malillugu qaqugukkulluunniit ataatsimiititaliamit tunuarsinnaapput. Taamatut pisoqartillugu sinniisoq siullemq ataatsimiititaliamut ivertinneqartassaaq.

Imm. 7. Najukkani ataatsimiititaliani ilaasortat ataatsimiinnernut peqataaneq ajorpata Allattoqarfik INUA, illoqarfimmilu pisortaq kommunalbestyrelsimut innersuussisinnaatitaapput, ilaasortaq tunuaqqullugu.

Imm. 8. Najukkami ataatsimiititaliaq ikinnerpaamik pingasunik ilaasortaqluni ingerlaannarsinnaavoq.

Siulittaasumik siulittaasullu tullianik qinersineq.

§ 6. Ilaasortat akornanni angajullersaat najukkami ataatsimiititaliap inissitsiterluni ataatsimiinnissaanut aggersaasuusaaq.

Imm. 2. Najukkami ataatsimiititaliap inissitsiterluni ataatsimiinnerani ataatsimiititaliamut ilaasortanit amerlanerussuteqartunit siulittaasutut qinerneqartoq ataatsimiititaliami siulittaasunngusaaq. Ataatsimiititaliamut ilaasortani angajullersaat qinersinermi aqutsisuusaaq. Siulittaasumik qinersineq pereerpat, najukkami ataatsimiititaliaq siulittaasup tullianik qinersissaaq, taannalu siulittaasumut taartaasassaaq.

Imm. 3. Ataatsimiititaliami ilaasortaq kinaluunniit siulittaasutut imaluunniit siulittaasup tullersortaatus toqqarneqarneq akuerissallugu pisussaaitaanngilaq.

Imm. 4. Siulittaasup imaluunniit siulittaasup tullia najukkami ataatsimiititaliamit tunuarpat, najukkami ataatsimiititaliap piffissap sinnerani atuunnissaa pillugu nutaamik qinersisoqassaaq.

Kapitali 3

Ataatsimiittarnerit

§ 7. Ileqquusumik ataatsimiinnerit qaqugu sumilu ingerlanneqassanersut, najukkami ataatsimiititaliap aalajangertassavaa. Piffissaq sumiifillu kingusinnerpaamik ullut 14-it sioqqullugit tamanut nalunaarutigineqartassapput. Ileqquusumik ataatsimiinneq nalinginnaasumik qaammammut ataasiarluni pisassaaq. Inissitsiterluni ataatsimiinnermi ukiumut ataatsimiiffissat najukkami ataatsimiititaliamit akuersissutigineqassapput. Taamatut iliortoqaqqissaaq ukioq ataaseq qaangiukkaangat.

Imm. 2. Najukkami ataatsimiititaliap ataatsimiinnissai siulittaasumit piareersarneqartassapput ilaasortanillu ataatsimiigiaqqusisartuussalluni. Najukkami ataatsimiititaliami isumaqatigiinniarnert taasinerillu siulittaasumit aqunneqassapput taassumalu aalajangerneri eqqortumik ingerlanneqarnissaat isumagissallugit.

Imm. 3. Suliat isumagineqartarneri siulittaasumit nakkutigineqassapput.

Imm. 4. Immikkut ittumik ataatsimiittoqartassaaq taamaaliortoqarnissaa siulittaasup pisariaqartippagu imaluunniit ilaasortat ikinnerpaamik pingajorarterutaasa tamanna piumasaqaatigippassuk. Immikkut ittumik ataatsimiinnerit qaqugu sumilu pissasut siulittaasumit aalajangerneqartassapput, tamakkulu sapinngisamik tamanut nalunaarutigineqartassapput.

Imm. 5. Oqaluuserisassat aammalu atortussat suliani oqaluuserisassanngortinneqartuni nalilernerqartussat pisariaqartut ataatsimiinnissap ulluinnarnit sisamanit sioqqullugu ilaasortanut nassiunneqarnissaat siulittaasumit isumagineqassapput. Suliaq kinguartinneqarsinnaanngippat, oqaluuserisassat atortussallu pisariaqartut piffissaasoq eqquutsinnagu nassiunneqarsimagaluartut, najukkami ataatsimiititaliaq aalajangiisinnaavoq. Oqaluuserisassat imaluunniit atortussat pisariaqartut piffissaasoq eqquutsinnagu nassiunneqarsimaneri oqaluuserisassanut allanneqarnissaa siulittaasumit isumagineqassaaq. Suliap nassiunneqarsinnaannginneranut/kinguartinneqarsinnaannginneranut tunngavilersuutit oqaluuserisasamittaaq allanneqassapput.

Imm. 6. Najukkami ataatsimiititaliamut ilaasortat kikkulluunniit siulittaasumut saaffiginninnermikkut oqaluuserisassanngortitsisinnaapput.

Imm. 7. Suliap imarisai najukkami ataatsimiititaliap ataatsimiinnerani oqaluuserineqartussat, kiisalu aalajangiisinnaanermut najoqqutassiaq, nipangiussisussaataaneq pillugu inatsisitigut malittarisassaq malillugu, sapinngisamik tamanut saqqummiussinnaasat assersuutigalugu kommunip allaffiatigoorlugu saqqummiunneqartassapput.

§ 8. Najukkami ataatsimiititaliap tamanut ammasunut ataatsimiittassaaq.

Imm. 2. Suliap qanoq ittuussusaa pissutigalugu, suliap ataatsimiinnermi matoqqasumi pisariaqarsorineqarpat, najukkami ataatsimiititaliamit oqaluuserineqarsinnaavoq. Suliassap matoqqasumik ataatsimiissutigisariaqarneranik apeqqut matoqqasumik ataatsimiinnermi isumaqatiginninniutaassaaq, taamaaliornissaq najukkami ataatsimiititaliamit imaluunniit siulittaasumit aalajangerneqarpat.

Imm. 3. Najukkami ataatsimiititaliap inuit kommunimi atorfeqartut akuerisinnaavai suliassat matoqqasumik oqaluuserineqarnerat najuuffigisinnaagaat. Taamaattorli, illoqarfimmi aqutsisoq sulisumik peqataatitaqartoqartuaannartussaavoq, aamma suliap ataatsimiinnerni matoqqasuni oqaluuserineqarnerisa nalaanni. Suliassap matoqqasumik oqaluuserineqarnerani inuit allat najukkami ataatsimiititaliap aggeqqusinnaavai suliassap nassuiarneqarnissaa pissutigalugu tamanna kissaatiginarpat.

Aalajagiisinnaassuseqarneq

§ 9. Ilaasortat ikinnerpaamik pingasut najuutsillugit najukkami ataatsimiititaliat aalajangiisinnaapput. Taasinerni naligiittoqassagaluarpat, siulittaasup taasina aalajangiisuusaaq.

Imm. 2. Aalajangernerni amerlanerussuteqarneq atorneqassaaq.

Aalajangiinnermi najoqqutassiaq

§ 10. Najukkami ataatsimiititaliap aalajangernerit aalajangernermi najoqqutassaarluni pisassapput, ataatsimeereernerillu kingorna tamatigut ilaasortat ataatsimeeqataasut atsiortassallutik.

Imm. 2. Ilaasortap kialuunniit piumasarisinnaavaa isummani allaasoq imaqarniliamut naatsumik allanneqaqqullugu, sulianilu pisortatut oqartussaasumut allamut ingerlateqqitassani piumasarisinnaallugu taassuma aamma imaqarniliap imaanik ilisimatinneqarnissaa. Ilaasortap taassuma suliap nassiuunneqarnerani suliap ilaqartissinnaavaa nammineq isummaminut tunngavilersuutigisaminik.

Imm. 3. Ataatsimiititaliap tamatigut ataatsimiinneranit imaqarniliaq, siulittaasoq suleqatigalugu, allaffeqarfimmiit suliarineqartassaaq. Imaqarniliaq ataatsimiititaliap ataatsimiinnerata kingorna kingusinnerpaamik ullut tallimat qaangiuppata ilaasortanut tunniunneqareersimassaaq.

Ilaasortat suliniuteqarsinnaatitaanerat

§ 11 Najukkami ataatsimiititaliamut ilaasortap kialuunniit kommunip susassaarfii pillugit apeqqutit sulluunniit najukkami ataatsimiititaliamut saqqummiussinnaavai aammalu tamakku pillugit aalajangiinissanut siunnersuutiniq saqqummiussisinnaalluni.

Kapitali 4

Ilaasortat suliassanik takunnissinnaatitaanerat

§ 12 Ataatsimiititaliap suliatut tigummisai kommunip allaffeqarfiani inaarneqarsimasutut saqqummiunneqartut pillugit, najukkami ataatsimiititaliamut ilaasortat kikkulluunniit sulinerminnut atatillugu suliatut atortussat misissuataarsinnaatitaavaat.

Imm. 2. Imm. 1 naapertorlugu suliamik takunnissinnaatitaanermut qinnuteqaat najukkami ataatsimiititaliami siulittaasumut qinnutigineqassaaq.

Imm. 3. Suliap sularineqarnera eqqarsaatigalugu, imaluunniit suliamik takunnissinnaatitaaneq pissusissamisuunngitsumik ajornartoortitsissappat, suliamik takunnissinnaatitaaneq borgmesterimit killilerneqarsinnaavoq pisariaqarsorineqarpat.

Imm. 4. Najukkami ataatsimiititaliamut ilaasortaq kinaluunniit qinnuteqarnini naapertorlugu suliambut aalajangersimasumut tunngasumi suliap assinganik nassinneqarsinnaavoq, imm. 1-3- mi periarfissamik atuinermini. Najukkamili ataatsimiititaliaq erseqqinnerusunik maleruagassiorsinnaavoq suliambut tunngasunik paasisutissanik nassinneqarsinnaanermut tunngatillugu, tamanna pisariaqartinneqarpat.

Kapitali 5

Suleqatigiissitat

§ 13. Suleqatigiissitaliat, sukumiisumik suleqatigiissitaliat, oqaloqatigiittarfiit aammalu ilinniartut suleqatigiit piareersarnermik siunnersuinertalimmillu piginnaasallit najukkami ataatsimiititaliamit pilersinneqarsinnaapput.

Kapitali 6

Suliami peqataasinnaannginneq.

§ 14. Ilaasortat ilaat suliassami aalajangersimasumi inuttut ima soqutigisaqartiginersoq, suliassaq taanna pillugu najukkami ataatsimiititaliap oqaluuserinninnerani taasineranilu peqataanngitsoortariaqarnersoq najukkami ataatsimiititaliap aalajangiiffigissavaa.

Imm. 2. Ilaasortap ataatsimiititaliaq ilisimatittassavaa pissutissaqarpat suliani aalajangersimasuni suleqataasinnaanermi apeqquingortitsisinnaasunik. Ataatsimiititaliami ataatsimiinnissaq sioqqullugu ilaasortap siulittaasoq tamanna pillugu nalunaaruteqassaaq.

Imm. 3. Suliambut najukkami ataatsimiititaliap ataatsimiinnerani oqaluuserineqartussamut tunngatillugu ilaasortaq attuumassuteqarpallaartussaasoq naatsorsuutigineqarpat, suliap oqaluuserineqarnissaanut sinniisoq siulleq siulittaasumit ataatsimiigiaqquneqassaaq.

Kapitali 7

Sinniisunik aggersaaneq

§ 15. Ilaasortap ataatsimiigiaqqusissutip tighunerani peqqissutsimik, naartunermik, erninermi sulinngiffeqarnermik imaluunniit meeravissiarternermik, allatigut pisortani inuussutissarsiuteqarnermik, niuernermik assigisaanilluunniit peqquteqartumik ataatsimiinnissami ataatsimi tulluuttuniluunniit arlalinni najukkami ataatsimiititalimi ataatsimeeqataasinnaannginnini siulittaasumut nalunaarutigissavaa. Tamatuma kingorna ataatsimiinnissamut sinniisoq siulleq aggersarneqassaaq.

Imm. 2. Ilaasortaq ataatsimiititaliami sulinini nangeqqissinnaanngorpagu, sinniisoq najukkami ataatsimiititaliamit tunuassaaq.

Imm. 3. Sinniisup ivertinneqarnerani piumasaqaatit qanoq issanersut najukkami ataatsimiititaliamit aalajangiiffigineqassaaq.

Kapitali 8

Najukkami ataatsimiititaliap Kommunalbestyrelsimut ilisimatitsissuteqartussaataitaanera

§ 16. Najukkami ataatsimiititaliap sumiiffimmi suliai pillugit pissutsinik paasissutissiinissamut Kommunalbestyrelse najukkami ataatsimiititaliamit aqutissiuunneqarlunilu nalunaarfigineqassaaq.

Imm. 2. Najukkami ataatsimiititaliaq Kommunalbestyrelsillu aallartitai ikinnerpaamik ukiumut ataasiarlutik oqaloqatigiinnikkut ataatsimeeqatigiittassapput.

Kapitali 9

Akissarsiat il. il.

§.17. Najukkami ataatsimiititaliamut ilaasortatut sulinermi akissarsiat Kommunalbestyrelsimut aalajangersarneqartassapput.

Imm. 2. Akissarsiat kommunalbestyrelsimut akigititatut aalajangiunneqartut naapertorlugit atuutsinneqartassapput. Maannakkut akigititat borgmesterip akissarsiaata 1/XX delii ileqqoreqqusap matuma atuutsinneqalernerani atuutissaaq.

Imm. 3. Akissarsiaqartitsinermi najukkami ataatsimiititaliamut ilaasortanut taamaallaat atuutsinneqarpoq.

Nakkutilliineq

§ 18. Suleriaatsimi ileqqoreqqusamilu matumani malittarisassat najukkami ataatsimiititaliamit malinneqarnerisut Kommunalbestyrelsimut nakkutigineqassaaq, aammattaaq pisortani malittarisassat atuuttut naapertorlugit ingerlatsisoqassalluni.

Kapitali 10

Atuutilersitsineq allannguutillu

§ 19. Ileqqoreqqusami allannguutit kommunalbestyrelsimut aalajangiiffigineqassapput, aamma najukkami ataatsimiititaliamit inassuteqaateqartoqarneranit aalajangiisoqarsinnaalluni.

§ 20. Ileqqoreqqusat 1. januaari 2019-imi atuutilissapput.

Aasiaat, ulloq 28. September 2018



Ane Hansen

Borgmester

Kommune Qeqertalik